



Di şêstemîn salvegera avabûna Komara Demokratîk ya Kurdistanê de, gaveke dîrokî ji aliyê PDK Îranê:

## TELEVÎZYONA TÎŞK WEŞANA XWE DÊ DEST PÊ BIKE

Di cejna 2'yê Rêbendanê (22.01.2006)'an, şêstemîn salvegera avabûna Komara Demokratîk ya Kurdistanê de, hevalê hêja û xebatkar, Kekê Mistefa Hicrî, Sekreterê Giştî yê PDK Îranê mizgîniyeke dîrokî da gelê Kurd. Kekê Mistefa Hicrî mizgîniya destpêbûna weşana bi "TEST" a televîzyona **TÎŞK** da raya giştî ya neteweya Kurd. Birêz Mistefa Hicr got: "Qirar bû di roja 2'yê Rêbendanê, 60'mîn salvegera damezrandina Komara Kurdistanê de, televîzyona **TÎŞK** weşana xwe bi "TEST" dest pê bike, lê ji ber hinek pirsgirêkên qanûnî, ev gave paš ket".

Birêz Mistefa Hicrî anî ziman û got ku di meha 2 ya 2006'an weşanên televîzyona **TÎŞK** dê dest pê bike.

Danîna televîzyoneke Kurdî ji aliyê PDK Îranê di 60 saliya avabûna Komara Kurdistanê de gaveke pir girîng û dîrokî tê hesabandin.

Li benda **TÎŞK** TV bin.

Bîranîna 60 saliya avabûna Komara Kurdistanê li binkeya Deftera Siyasî a PDK Îranê de hat pîroz kirin **R.3**

Bersiva PDK Îranê bi nameya xwendekarên Îranî yên parêzerên aşti û mafên mirovan **R. 6**

Sefera Ehmedînejad bo Sûriyayê û ...

Ehmedînejadê terorîst sefera welatê hevalbenê xwe Sûriyê kir...

**R. 6**



### ŞAREZAYÎ

Şarezayî, her çendî ku îro wekî hemdemî, aşti, aramî û hêmindariyê tê bilêvkirin jî ew...

**R.9**



Ji bo bidestveanîna armnacên Komara Kurdistanê

**Pîroz be biranîna 60 saliya avabûna Komara Kurdistanê**

Partiya Demokrat ya Kurdistanê Îranê



2'yê Rêbandana 1384 (2705' an ya Kurdi) • 22'yê Janviya 2006

**Towards the Fulfillment Objects  
of the Republic of Kurdistan**

January 22, the 60 th. Anniversary of Republic  
of Kurdistan's Establishment

Democratic Party of Iranian Kurdistan



# Daxuyanî Bi hinceta şestemîn salvegera avabûna Komara Kurdistanê

**H**ewwelatî yên birêz!  
**Gelê xebatkar yê Kurdistanê!**  
2'yê Rêbendana 1384'an ya

Rojî hevberî 22'yê Janviya  
2006'an ya Zayînî, şestemîn

salvegera avabûna dewleta Komara Kurdistanê li bajarê Mehabadê ye. 60 salan berî niha di roja 2'yê Rêbendana 1324'an ya Rojî de bajarê Mehabadê şahidê damezirandina hikûmetekî niştimanî û neteweyî di dîroka teji bûyer ya xelkê Kurdistanê bû ku her çiqas tenê 11 mehan li ser pêyê xwe sekinî, lê bû çirayê ronahîker yê rêça xebatkarên rêya azadî û rizgariya neteweya Kurd di hemû parçe yên Kurdistanê de. Bi vê boneya pîroz li ser navê Komîteya navîn û gişt endam û alîgirên Partiya Demokrat ya Kurdistanê Îranê, avaker û mîratgirê Komara Kurdistanê, em pîrozbahiyên herî germ pêşkêşî civatên xelkê Kurdistanê û azadîxwazên seranserê Îranê û tev hogirên azadî, demokrasî û dadperweriyê di herêma Rohhilata Navîn û cîhanê de dikin.

Avabûna Komara Kurdistanê ku tevî hemû pîvanekê weke bûyera herî girîng ya teji serfirazî a xebata xelkê Kurdistanê heta dawiya sedsala bîstan tê hesabandin, berhema dehan salan xwe gorîkirin û nişana hezkirina civatên gelê Kurd ji bo azadî û bidestvegirtina çarenivîs û belgeya hişyarî ya rêberiya nû a tevgera azadîxwaz ya Kurdên Îranê bû ku di Partiya Demokrat ya Kurdistanê bi serokatiya Qazî Mihemedê nemir de xwe vedît. Di rastî da eva nîrxandina hûr û jêzanî ya Pêşewa **Qazî Mihemed** û hevalên wî bû ku rê ji bo mifah wergirtin ji rewşa piştî dawî pêhatina şerê duyem yê cîhanî xweş kir hetanî bikarin di parek her çiqas biçûk ya Kurdistanê de hêviyên mejîn û dîrokî yên civatên gelê Kurd bi destve binin û yekemîn hikûmeta nûjen ya Kurdî ava bikin.

Rast e Komara Kurdistanê di bingehê de ji bo bidestveanîna mafên neteweyî yên gelê Kurd hatibû damezrandin. Lê li gorî pîvan û mercên dunyaya pêşketî ya îro jî, hikûmeteke nûjen bû. Rêberên vê Komarê û li serveyî hemûyan **Pêşewayê Şehîd** bi awayekî kûr û berfireh ji wate û hewcehiyên civakekî nûjen û pêşverû fêhm kiribûn. Heke em lîstînekê bi ser dîroka dût û dirêj ya xebata xelkê Kurdistanê bidin, çend nimûne û mînakên teji serbilindî ji bidestvegirtina desthilatê di parçeyên cuda cuda yên Kurdistanê de tên xuya kirin. Lê xasmaniya berçav ya Komara Kurdistanê li vir de ye ku yekemîn desthilata Kurdî ye ku bi kiryar ji bo cîgirîkirina demokrasîyê, desthilata gel û avakirina dezgeh û sazîyên civaka

sivîl(medenî) gav avêtiye. Bi serbilindî ve em dikarin bibêjin ew demokrasîya ku di wê heyama kurt ya temenê dewleta Komara Kurdistanê de hatibû cîgir kirin, heta niha jî di kêma civakên Rohhilata Navîn de nimûna vê tê xuya kirin.

Komara Kurdistanê hikûmeteke neteweyî bû, lê asoya dîtina vê gelek berfirehtir ji vê çendê bû ku tenê ji bo bidestveanîna mafên neteweyî yên gelê Kurd bixebite. Vê Komarê û partiya avakerê wê ji bo pêşxistina civakê di hemû warên cur bi cur yên aborî, civakî û çandî de bername hebû û çêtirîkirina jiyana tex û qata jar, xizan û destkurt di refa pêşîn ya armancên xwe de danibû. Her çiqas Komara Kurdistanê hikûmetekî herêmî û lokalî bû, lê qet hevpeywendî tevî gelên din yên Îranê li berçav bizir nebû û li gor şiyar û karîna xwe ji bo qahîmkirina tîkiliyên biratî û hevxebatî tevî gelên din yên Îranê û hêzên wan



yên welatparêz di cehd û hewildanê de bû. Pêkanîna Eniya Hevgirtî bi parek ji hêzên siyasî yên wê demê ya Îranê re û nemez girêdana peymana du alî tevî Hikûmeta Niştimanî ya Azerbaycanê belge û nişana ne înkâr kirina vê îdeyê ye. Bi giştî desthilatdariya Komara Kurdistanê tenê hikûmeta beşek ji Kurdistanê Îranê bû. Lê him rêberiya Partiya Demokrat û Komarê ew hikûmet ya hemû neteweya Kurd li Îranê û parçên din yên Kurdistanê dizanîn û him civatên gelê Kurd li hemû cîhên Kurdistanê bi hêviyên mezin mêzeyî vê Komara sava dikirin.

Em hemû dizanin ku ji bo rê û resma avabûna Komara Kurdistanê hin nûner ji Kurdên parên din yên Kurdistanê jî hatibûn vexwendin û şahidê ji dayîkbûna yekemîn hikûmeta komarî ya dîroka neteweya xwe bûn. Lê berî avabûna komarê jî, ew pêşwaziya germ ya ku bi hatina Barzaniyan û Efserên azadîxwaz yên Kurd ên Arteşa Îraqê hate kirin, xuyakerê ew riha neteweyî bû ku bi

ser bîr û ramanên rêberiya tevgera Kurd di wî parçeyên Kurdistanê de zal bû. Li hember de jî ew xizmetên mezin ku Kurdên beşên din yên Kurdistanê di hemû warên hînkirin, çandî û leşkerî de bi Komara Kurdistanê kirin, nişana vê çendê bû ku hemûyan ew Komare bi ya xwe dizanîn û bi hêvîdarî ji bo pêşerojê gelek geş û ron dinêrîn. Di vê navberê de nahê kirin ku bi xasmanî qala roleka mezin û jêhatî ku xebatkarên Barzanî bi serokatiya rêberê navdar yê Kurd Mele Mistefa Barzanî di parastina Komara Kurdistanê û bidestxistiyên vê de bi stû girtibû, nehê kirin. Ya rast eva ye ku Barzaniyan û Efserên azadîxwaz yên Kurdistanê Îraqê ku roleke girîng di elimandin û prewerdekirina hêza Pêşmergên komarê de lîstin, beşa herî ser û ber ya Hêza Pêşmergên Kurdistanê bû û her di vê demê de jî eva ku di şiyar û karîna wan de bû di xizmeta Komara Kurdistanê de bi kar anîbûn. Lewra jî bû ku rêberiya komarê kar û xebatên herî girîng bi wan re dispart û ne tenê wek hêzeke alîkariyê, belkî bi parek bibandor ji kadroyên parastina hikûmeta Kurdistanê dihatin hesabandin. Bê sedem nebû ku tenê ji wan çend dereceyên Generaliyê ku di Komara Kurdistanê de hatin bexşandin, yek ji wan pêşkêş bi Mele Mistefa Barzanî hate kirin.

Temenê Komara Kurdistanê kurt, lê teji destkevî û serfirazî bû. Bê guman destkevî herî girîng ya Komarê eva bû ku gelê Kurd di parek ji welatê xwe de çarenivîsa xwe destve girt û hikûmeteke gelî û demokratîk ava kir. Cuda ji vê çendê hin bidestxistiyên wekî pêşdebirina ziman, wêje û çanda Kurdî, pêkanîna hêzekî ser û ber ya çekdar û peyda kirina navê pîroz yê Pêşmerge, pişikdarî kirina jinan di jiyana siyasî ya civaka Kurdewarî de û pêkanîna Yekitiyên Jinan û Ciwanan û bi giştî hewl û cehda pêşdeçûna zanî û hişyarî ya siyasî di civaka Kurdistanê de, ji xizmetên xuya yên hikûmeta Kurdistanê ne.

## Hewwelatî yên hêja!

Mixabin tenê 11 mehan piştî 2'yê Rêbendana 1324(1945)'an, bi pîlan û kompiloyeke hevbeş ya Împiryalîzm û kevnarperweriyê, Komara Kurdistanê hilweşiya û wezîfa biçînanîna erk û ehdên vê ji bo nîfisa piştê bicîh hêla. Li ser sedemên hilweşiyana Komara Kurdistanê gelek tişt hatiye gotin û nivîsandin, zaf caran cehd û bizava hatiye kirin berpîrsiyarîna tîkçûna komarê li stûyê piştewarê derveyî yê komarê, yanî Yekîtiya Soviyeta berê were xistin. Lê bi bawerîya me eva sadekirina pîrsê û revîn di bin

berpirsiyariyê ye. Tevî vê çendê guman nahê kirin ku hem piştgîriya Hikûmeta Soviyetê ji Hikûmeta Kurdistanê, di avakirina û pêşdebirina komarê de bibandor bûye û him tenê hêlana vê û lihevkerin bi dewleta vê demê ya Îranê re li ser îmtiyaza petrola Bakûrê Îranê bandor li ser hilweşiyana Komara Kurdistanê hebûye, em bawer in him avakirina komarê di pileya yekemîn de berhema daxwaza rêberiya tevgera Kurd bûye û him beşa bingehîn ya berpirsiyariya herifîna vê dikeve ser milê rêberiya Komara Kurdistanê û Partiya Demokrat ya Kurdistanê. Renge em bikarin sedemên herî girîng yê hîloşîna Komara Kurdistanê dixalên jêrîn de kurt bikin:

Nebûna hêzekî bibandor, tesîrker û xwedî şiyana ya çekdar ku bikare li hember êrîşa Arteşa Îranê raweste û parêzvanîyê ji komarê bike, nebûna bingehêke xurt û bihêz ya aborî û malî, qahîm nebûna Eniya hundir û hebûna hinek hêz û eşîran ku heta li serdemê desthilata komarê jî de peywendî bi desthilata navendî re hebûn, bertengbûna melbenda nifûza hikûmeta Kurdistanê û pitir ji vê jî berhev nekirina heta vê parê jî ku di bin zêrevaniya komarê de bû, hîloşîna li nişkêre û bê berxwedan ya hevalbenda tenê û nêzîk ya komarê, wate Hikûmeta Nîştîmanî ya Azerbaycanê, jarî û bê şiyana bûna Eniya Hevgirtî ya hêzên siyasî yê Îranê û li serveyî hemûyan Partiya Tûde(Komonîst) ku karîna tu piştgîriyê jî du hikûmetên Kurdistê û Azerbaycanê nebûn û serbarê hemû vana jî hitbar bi xwe nebûna rêberiya komarê bû. Hekene her wekî rêberê şehîd **Dr. Qasimlo** di pirtûka **çil sal xebat di rêya azadiyê** de bas kiriye, berxwedaniya çend mehî ya Barzaniyan da xuya kirin ku îmkanê berxwedaniyê hebû û desthilata Paşatiyê ne ew desthilat bû ku bikare bi hêsanî li hember vê berxwedaniyê bisekine û têk bişkîne.

Hewceye bihê gotin ku ev şiroveye bi tu awayekê jî bo kêmgirtina rolê rêberên komarê nine û tenê ji ber vê çendê ye ku rêvingên rêya komarê û berî hemûyan jî PDK Îranê ceribînan lê bigirin û di pêşerojê de pitir bi hêza xwe piştrast bibin.

Bi her halê heyî Komara Kurdistanê hilweşiya. Lê berevajî nêrîn, xwezî û hêviyên dijminên azadiyê, bi herifîna komarê kela bawer û viyana rêvingên rêya azadiyê ne hilweşiya. Armancên ku Komara Kurdistanê ji bo wan hatibû avakirin, di dilê rêvingên rêbaza komarê de zindî man û di hemû parçeyên Kurdistanê jî bo wan xebat hate meşandin û xwîn jî rijandin. Ewa ku îro di Kurdistana Îraqê de bûye sebaba rêzgirtin û pesna tev rêvingên

rêya azadî, heq û dadperweriyê bo aliyê xwe rakîşandiyê, di rastî de kemiladina wezîfên nîvmayî yê Komara Kurdistanê ye, armanc her armancên Komara Kurdistanê ne, dirûşm kêr û zêde her dirûşmên vê komarê ne û tenê li gor rewşa serdem hin guhartin bi ser de hatiye û heta ala wê jî bi guhertinên kêr (rakirina armê û danîna rojê) her ew ala ye ku di Komara Kurdistanê de hatibû hildan.

### Xebatkarên rêya azadiyê!

Cihê kul û keserê ye ku şêst salan piştî avabûna Komara Kurdistanê rejîmek hikûmetê bi ser malbenda desthilata komarê û hemû wan parên Kurdistanê û seranserî axa Îranê dike ku ne tenê gelîtir, mirovîtir û pêşkevîtir ji rejîma paşatiyê ya dewrana komarê nine, belkî gelek ji vê hikûmetê paremayî û heta tevî rewşa vî serdemî nenas û biyanî ye. Li hember wê de cihê serbilindiyê ye ku xelkê Kurdistana Îranê û Partiya Demokrat ya Kurdistana Îranê gelek pitir ji serdemê Komara Kurdistanê hez dike bi armancên komarê bigihîjin û di vê rêyê de bo her cure xwe gorîkirinekê amade ne. Her di vê demê de ew tevî pêşkevîna civaka mirovahiyê pêşve çûne, tevî rewşa serdem nasyar in û parek ji cehd û bizavên mirovahiya pêşkevî jî bo cigîrkirina aşî, azadî, demokrasî, mafê mirovan û wekhevî ya civakî ne.

Partiya Demokrat ya Kurdistana Îranê bi rêbaza avakerên partiyê û komarê û li serveyî hemûyan **Pêşewa Qazî Mihemed** biehd û bisoz e. Cehda cigîrkirina demokrasî û bidestveanîna mafê neteweyî wekî du stûnên bingehîn yê armancên komarê îro pitir ji her demekê jî bo Partiya Demokrat û ji vê jî berfirehtir ji xelkê Kurdistanê re armanc in, mîna serdemê komarê, partiya me di cehda xebata hevbeş û têkiliyên dostîniyê tevî hêzên siyasî yê seranserî Îranê de ye û bi xasmanî girîngî û bihagiraniyêke zêdetir ji bo hevpeywendî tevî wan hêzan dide ku nûnerayetiya gelên zulmîlekîrî yê Îranê dîkin. Partiya me xwe li hember qahîm û xurtkirina Eniya navxwe û çêkirina pira pêwendî û alîkarî tevî hêzên siyasî yê çepera tekoşîna azadîxwaz ya Kurdên Îranê xwedî ehd dizane û derheq parçeyên din yê Kurdistanê de jî Partiya Demokrat şanaziye dîke ku têkiliyêke baş tevî hêzên siyasî yê pişikdar di tevgera Kurdan di tev parên Kurdistanê de heye û qet jî ne veşartîye ku Kurdên Îranê û Kurdistana Îranê bi beşek ji Kurd û Kurdistana Îranê û hemû demekê hazir bûye û amade ye ji bo xizmet bi pêşkevîna tevgera Kurd di hemû beşeke Kurdistanê de her hevkarîyê jî dest bihê pêşkêş bike û her gorîkirinek hewce be, kêmasiyê neke. Bi hinceta salvegera avabûna komara Kurdistanê

em tevî canê paqij yê rêberên Komara Kurdistanê û hemû şehîdên Partiyê nemaze serwerên Şehîd **Qazî, Qasimlo** û **Şerefkendî** û her wisan tevî civatên xelkê Kurdistanê peymanê xwe nû dîkin ku heya serkevîna yekcarî û bidestve hatina hêviyên Komara Kurdistanê ala xebatê li erdê nedin û di vê rêyê de ji tu cehd, xebat û xwe gorîkirinekê kêmasiyê nekin.

### Silav ji bîranîna avakirina Komara Kurdistanê

#### Silav ji canê paqij yê avakerên komarê û li serveyî hemûyan

#### Pêşewa Qazî Mihemed

#### Payedar bin hêviyên pîroz yê

#### Komara Kurdistanê

#### Bihiloşe dîktatorî û kevneperestî

#### Partiya Demokrat ya Kurdistana

#### Îranê

#### Komîteya Navendî

#### 2' yê Rêbendana 1384'an ya Rojî

#### 22'yê Janviya 2006'an ya Zayînî

## Bîranîna 60 saliya avabûna Komara Kurdistanê li binkeya Deftera Siyasî a PDK Îranê de hat pîroz kirin



Roja 2'yê Rêbendana 1384 (22.01.2006)'an, rê û resmeke hêja û berfireh li binkeya Deftera Siyasî li Koyê bo yad û rêzgirtin ji 60 saliya avabûna Komara Kurdistanê û nîşandana soz û emeknasîyê bi armancên wê dewleta Kurdî hate lidarxistin. Di vê rê û resmê de ku hemû endamên rêveberiya partiyê û nûnerên hejmarek ji dezgeh û sazîyên Hikûmeta Herêmê li bajarê Koyê û hejmarek zor ji kadro û Pêşmergeyên Partiyê û malbatên wan pişikdar bûn li destpêkê de, bi nîşandana kurte filmêkê li ser dîroka Komara Kurdistanê di warên cuda cuda de û sirûda neteweyî ya **Ey Reqîb** hate dest pê kirin. Piştre Peyama Deftera Siyasî ji aliyê Sekreterê Giştî yê partiyê, birêz Mistefa Hicrî hate pêşkêş kirin.

Piştir peyemên Yekîtiya Jinên Demokrat a Kurdistana Îranê, Yekîtiya Xwendekarên Demokrat ya Kurdistana Îranê, Yekîtiya Ciwanên Demokrat ya Kurdistana Îranê hatin pêşkêş kirin.

Hêjayî gotinê ye ku rê û resm bi çend parçe helbest, sirûd û stranên bi dawî hat.

# Deqa axavtina birêz kak Mistefa Hicrî di rê û resma 60'mîn salvegera avabûna Komara Kurdistanê de

**X** elkê bi şan û şeref yê Kurdistanê!  
Kadro û Pêşmerge, Endam û tagirên PDK Îranê!  
Mêhvanên hêza yên pişikdar

**di rê û resma bîranîna 60'mîn salvegera avakirina "dewleta Komara Kurdistanê"!**

**Silavên serbestî û azadiyê!**

Her wekî hûn gişt aliyek agehdarin, şêst salan berî niha di rojê wekî îro de 2'ê Rêbendana 1324(1945)'an, Dewleta Komara Kurdistanê li bajarê Mehabadê hate avakirin. Bi vê hincetê ez pîrozbahiyên germ yên xwe û rêberiya partiyê pêşkêşî tev gelê Kurd li her derekê bin dikim. Silav û pîrozbahiyên taybetî ji bajarê Mehadê, bajarê Komarê û bajarê Qazî!

Piştî destpêkirina şerê duyemîn yê cihanî di sala 1320(1951)'an pêde, leşkerê Sor ji Bakûr û hêza Bîrtaniya û Amerîkayê jî ji Başûr ve dest bi ser welatê Îranê de girtin û rejîma Riza Şah bi bê berxwedanî hate hilweşandin.

Bi jî navçûna desthilata zordar ya Riza Şah hinek azadî di Îranê de peyda bûn û rêxistinên siyasî geşe kirin. Di vê zîrûfê de ku başûrê Kurdistanê Îranê ketibû bin desthilata Amerîka û Bîrtaniyayê, û beşa Bakur jî heya bajarê Urmîyê di bin desthilata hêza Sor de bû, herêma Mehabadê herêmeke azad bû û çî yek ji van desthilatan tê de akincî nebûn.

Dirêjîya vê rewşê û bûna azadiyên demokratîk di Îranê de û herwiha têkçûna Alman Nazi û faşîzmê rews ji bo avakirina PDK Îranê weke partiyeke pêşeng û bersivderê vê rewşa nû rêxist. PDK Îranê di 25'ê Gelawêja 1324'an ya Rojî de hate avakirin û di 2'ê Rêbendana hemem salê de, Dewleta Komara Kurdistanê li bajarê Mehabadê pêk ani.

Yek ji taybetmendiyên Komara Kurdistanê eva bû ku rêberiyêke rêxistî weke PDK Îranê hebû. Di dîroka neteweya Kurd de yekemîn car bû ku partiyeke pêşeng û demokrat desthilata siyasî a herêmekê bi awayê Komarî bi wateya desthilata xelkê bi destve girt. Komara Kurdistanê weke hikûmeteke pêşkevî li ser bingeha demokrasî, mafê neteweyî û dadmendiyê hate avakirin.

Hikûmeteke nûjen bi vê wateyê ku ger di tevgerên pêştir de, desthilat di destê serok eşîr, mîrekî olî, yan jî xwedan milkekê de bûye, di vê hikûmetê de partiyeke pêşverû ku di serî de Serkomarê bîrîmend û jêhatî yê gel Pêşewayê nemir Qazî Mihemed rawestiyabû, ev hikûmet rêve dibir.



Yek ji cudahiyan van du terze desthilatane eve ye ku tevgerên rabihorî zaf daran bi awayekê bûye ku bilez geşe kiriye û herêmeke pan û berfireh xistiye jêr desthilata xwe lê bi jinavçûna serok hemû tiştek bi dawî bûye û desthilat wekî xwe nemaye, lê bi hiloşîna Komara Kurdistanê û bi darvekirina Serok Komarê wê û qehremanên din yên wê Komarê, ne tenê bizav her nerawesta û têkneçû, belkî komar û buhagiraniyên bilind û mirovî yên wê bûne remza berxwedaniyê û egera rêya pir evraz û nişîv ên xebatê ji bo bîdestveanîna ducarîkiya wan destkevtên buhagiran ku komarê dabûne xelkê Kurdistanê.

Nîşaneyêke din a nûjen bûna komarê enternasyonal bûna komarê bû. Berevajî piraniya desthilatên derbasbûyî ên tevgera Kurd, vê hikûmetê ne tenê her kêmîyanê neteweyî û olî nedicewisandin û ecmaniyên nedikirin, belkî ew di heyamê temenê komarê de bibûne xwediyê wan hemû mafan ku Kurdan hebûn. Komar piştevanê zor bi hêz yê Cihû, Ermenî û wan Turkan bû ku li jêr desthilata komarê de dijiyan. Ji bilî vê yekê peywendiyêke baş jî bi Turkên cîran bi xasmanî bi Hikûmeta Neteweyî a Azerbaycanê re damezirand.

Hebûna azadiyê bi giştî terzên xwe di heyamê kurt yê komarê de ji xalên bingehîn û sereke yên nûjen bûna komarê ye. Arçî rozwêltê Amerîkayî ku li serdemê komarê bo serdan çû bû Mehabadê dibêje: "Tiştek bo mirov ciyê heyrîmanê ye, ew jî ew rewş û hewayê azad e ku di Mehabadê de heye".

Pêkanîna Yekîtiya Jinan û Yekîtiya Ciwanan ji pêkhatiya eşîretî a nifûsa Kurdistanê di çaxê komarê de ku pitir ji 95 jî sedê ji akinciyên wê nexwenderwar bûn û zaf bernamên din nîşaneyê bîra nû û

hewildan bo pêgehandina xelkê bona gihîştin bi pêserojeke geştir û pir ji bextewerî bû. Her lewma ye em dibînin Kurdên beşên dinê jî rû dikene komarê û bi dil ve xizmetê bi komarê dikin. Mînaka baş a vê hevkarîyê, Barzanî ne, ew hêza herî bi ser û ber a Kurdistanê bûn ku heya rojên dawiyê li qada Seqizê ku yek ji eniyên girîng ên hêza Pêşmerge bi dijî hêza rejîma Şa bû û qehremantiyeke zaf ji xwe nîşan dan, diyare komarê jî ne tenê ew bi mêvan nedidanin, belkî ew bi xwedan mal dizanîn.

**Xûşk û birayên hêjal!**

Heke piştî şêst salan yad û bîranîna komarê ji aliyê xelkê Kurd li Kurdistanê Îranê û beşên din bilind tê ragirtin, ew pîrensîpên pêşkevî û serdemiyane bûn ku komar li ser hate avakirin ku ya herî girîng mafê neteweyî yê gelê Kurd bû bi awayê Otonomî. Di vê cure desthilatdariyê de gelê Kurd û neteweyên din ên Îranî dê desthilata rêvebirina herêmenê akincîbûna xwe hebin û li rêvebirina Îranê jî bi giştî pêka nifûsa xwe û li gor qanûnê beşdar dibin, ev daxwaziye bi dehan salan piştî avakirina komarê jî her daxwaza sereke a tevgerên Kurdan li beşên cur bi cur pêk dianî û heta PDK Îranê jî heya kongireya 13'mîn a xwe ku di meha 6'ê a sala 2004'an de hate lidarxistin dirûşma wê ya sereke Demokrasî bo Îranê û Otonomî bo Kurdistanê bû, di vê kongireyê de piştî berhevdana guherînan cîhanê û herêmekê, Federalîzm kire dirûşma xwe.

Bi kurtî hemû ew buhagiraniyên wekî demokratîzasyon, azadî, mafên mirovan û dadperwerî ku di vê serdemê de rûmeta cîhanê guheriyê û wekî piroseyekê bilez berev vê yekê diçe ku cîhanê nû biafirîne, 60 salan berî niha di Komara Kurdistanê de tîn dîtin.

Renge li vir de ev pirsîyare derkeve holê ku komar serbarê ve ku xwediyê wan hemû buhagiraniyên mirovî û pêşkevî bû, çima hilweşiya Bersiv bo vê pirsîyare zor in, lê renga yê herî girîng berhevdan li asta navdewletî, herêmi û navxweyî li serdemê komarê de be ku li vir de em dê bi kurtî qala wan bikin:

Piştî bi dawî hatina şerê duyemîn yê cihanî em di asta navneteweyî de berbirûyê sistemêkê bûn ku dixwest di çarçoveya du mijarên zal, wate Sosyalîzm û Sermayedariyê de qewareyekê pêk bîne ku leyîzên siyasî û hemû bizavên cîhanê di çarçoveya wan du gotarane de bihên pênase kirin. Yek ji taybetmendiyên wan du

mijarane eva bû ku hemû hewl û bizavên ku bo alîkarî kirin bi bizavên rizgarîxwaz dihate kirin bo vê çendê bûn ku cure hevsengiyek di navbera van du mijarane de pêk bihê. Ekterên bi bandor li ser vê hevsengiyê hazir nebûn ku bi tu terzekê nixê bo buhayên weke azadî û demokrasiyê bidin. Wate mifah wergirtin ji azadî û demokrasiyê pêka her yek ji wan aliyan tenê berteng kirina qada çalakî û berjewendiyên aliya din bû. Li vir de azadî û demokrasi tenê di asta dirûşm de hayderê bizav û



tevgeran bûn û di asta bikiriyar de tu hêzek amade nebû ku nixekê bo çî bi çî kirina wan buhayane bidet. Di hemen demê de sîstema navneteweyî aligirî ji qewareyekê dikir ku bi terzekê rûyekî bi navê dewletê nûneratiya hemû kar û baran dikir. Ew Ektere di çîhana sêyem de bi tu terzekê bersivderê rewş û zirûfa wan civakane nebû û azadî û demokrasi her bi pênaseya dewletê ve rêz jê dihate girtin.

Bi vî terzî em dibînin ku rewş û zirûfa wê demê bo dîtingeha komarê derheq bi sîstema çîhanî teba nebû û komarê tevî sîstema navneteweyî dozeke kakilane hebû. Azadî û demokrasi di wê serdemê de tenê di çarçoveya hevalbendî û herwiha bo dijberî kirin di hember aliya berjewendîxwaz de wateya xwe peyda dikir. Wate hevalbendên Sermayedar xwe bi azadîxwaz dihesibandin heya demekê ku dikarî pîvanekê ji cemsêra Sosyalîst werbigrin û di hember de aligirî Sosyalîst heya demekê piştvanî ji gelên çewisandî dikir ku qada çelengî û berjewendiyên Sermayedarî diketê cihê tirsê û berjewendiyên Yekîtiya Soviyetê misoger dibûn.

Di asta herêmî de komar di erdnigariyekê de serî hilda ku bi Rojhilata Navîn dihate pênase kirin. Ev herême ku piştî şerê yekem yê çîhanî qeware û pêkhatiya wê li ser bingeha dewlet - netewe hatibû çêkirin, piştî şerê duyem yê çîhanî ev pêvajoye domand û çarçoveya sîstema navneteweyî piştî şer hemû leyizên siyasî bi ji berçav girtina wan dewletane birêve diçû û dewletên Rojhilata Navîn karî bûn xwe bi tevahî biselîmînin û roj bi roj dirêjî bi desthilata zorxwazane ya xwe bidin. Her yek ji wan dewletane xwe bi aliya Rojava yan Yekîtiya Soviyetê ve girê didan û bi çêkirina vê terze hevalbendiyê hemû cehd û

xebitînek bo azadî û demokrasiyê serkut dikirin. Îran, Sûriye, Turkiye û Îraq nimûneya herî berçav a wan dewletane ne.

Li derveyê vê herêmê de jî mijarek hebû ku pêdeçûnê li ser vê rewş û zirûfê bike û yan biherifîne. Bi kurtî em dikarin bibêjin ku azadî û demokrasi di Rojhilata Navîn de bi giştî nenaskirî bûn.

Dema ku em têne ser behsa hundirîn, di vir de merema me ew dewletane ne ku Kurdistan bi ser wan de hatiye pervekirin. Qewareya siyasî a wan welatane tenê çavkanî li pişkek ji pêkhatiya nifûsa wan welatane bi xwe ve digirt, bo nimûne Turkiye sembola Turk, Îran sembola Fars û Îraq sembola Ereb bûn.

Pêkhatiya wan welatane di çarçoveyek yekdem de dizivirî û tenê bersivderê berjewendî û hewcehiyên pişkek ji civakê bû û bi tu terzekê qewareya siyasî ya wan welatane nûneratiya giştî aliya nava civakê nebû di wan welatane de diyalog û piloralîzm tu buha û nixek nebû. Di qewareyekê de ku Ereb, Fars û Turk hemû tiştek bi navê yekgirtina axa dewletên xwe ve tepeser dikir, azadî û demokrasi tenê di cihekî biçûk weke Kurdistanê de çawa dikarî dengê xwe bilind bike?

Piraniya wan heger û paremayî a gelê Kurd di wê serdemê de ku bi xwe hewcehi bi behs û berhevdaneke kûr û berfireh heye, destê xwe dane hev û Komara Kurdistanê hilweşandin. Di rastî de êrişa leşkerî a Şah di Sermawez sala 1325(1946)'an de bo ser Mehabadê û hilosandina komarê bi xwe encama wê rewş û zirûfa siyasî a navxweyî û derveyê bû ku dîr ji viyana gelê Kurd û xelkê Mehabadê pêk hatibû û bi dijî berdewam bûna komarê pêşve diçû.

Serbarê vê çendê jî, heke avabûna Komara Kurdistanê hêviyê mezîni bi gelê Kurd di Kurdistanê Îranê û hemû beşên din yê Kurdistanê bexşî û nasnameya Kurdî zindî kir, hilosîna vê komarê herçend bo heyamekê xelk veciniqand û ew ji xema ji destçûna komara sava ya wan û piraniya kesayetiyan navdar yê komarê û li serveyî hemûyan Pêşewa veciniqand, lê partiya avaker ya komarê Partiya Demokrat ya Kurdistanê bi çok de nehat û di heyamê şeş deh salan de, di nava dehan asteng û girêpêçkên dujmin û neyarên xwe de bi gorî kirina hezaran qurbanîyan din ji xortên herî baş yê xwe, herwisser bilind di hember dîrok û gelê xwe de bisekine û cehd û tekoşînê bike ku careke din Komareke Federal bo gelê Kurd ku evîndarê azadiyê ye bi hevdengiya hemî hêz û aliya resen yê Kurd di Kurdistanê Îranê de li ser buha û pîrensîpên Komara Kurdistanê pêk bîne.

### Hewwelatî yê rêzdar!

Pêvajoya bûyer û guhertinan li avabûna komarê ve heya niha di Îranê û herêmê de ber bi aqarên cuda ve çûne, heke li Îraqa cîranê Îranê desthilata Bees hatiye hilosandin û di vir de xûşk û birayên me yê Kurd bi pişkek ji mafên neteweyî yê xwe di sîstema Federalî de şad bûn û di hikûmetên din yê herêmê de jî weke Turkiyê valahiye ber bi rûyê azadiyan û bi taybetî mafê Kurd hatiye vekirin, di welatê me Îranê de desthilata girûpeke paremayî ku Ol kirine amrazek bo berjewendiyên xwe û navê vê kirine Komara Îslamî a Îranê, cihê rejîma hov a Paşatiyê girtiye û welat ber bi dewranên berê ve zivirandiye, di vê hikûmetê de ku berevajî navê wê ne komarî ye û ne jî pêwendî bi xelkê Îranê ve heye, tu behsek bi navê azadî, demokrasi û mafê neteweyî di holê de nine. Ew ne tenê tu mafekê bo xelkê Îranê bi heq nizanin, belkî behsa ji nav birina neteweyek weke Îsraîl li ser rûyê erdê dikin, piştvanîyê ji terorîzmê dikin û dijî aşti û hêmdariyê di herêmê de ne. Em di vê roja dîrokî de careke din dubare dikin ku gelê Kurd li Kurdistanê Îranê û partiya avaker ya Komara Kurdistanê di eniya dijî terortê de ne, aligirî aşti û bi hev re jiyana serdem tevî cîranên xwe û pabend bi hemû buhayên mirovî ne ku Rêxistina Neteweyên



Yekbûyî bawerî pê heye.

Em li ser vê baweriyê ne ku hevgirtina hêzên demokrat yê hemû neteweyên Îranê û Kurdistanê li dijî Îranê di vê rewş û zirûfê de erkeki bilez a hemû Îraniyêke welatparêzê vîzar ji desthilata hakim bi ser vî welatî de ye, bo vê meremê jî em li pêşiya her terze hevkarîyê ne û pêk hatina Kongireya Neteweyên Îrana Federal ku parek ji hêza neteweyên Îranê weke Ereb, Belûç, Turkmem û Kurd li dora xwe kom dike, hemû nîşana wan alîkariyan in.

Li bîranîna 60'mîn salvegera avabûna Komara Kurdistanê de em silavan dişînin bo canê paqij yê Pêşewayê nemir Qazî Mihemedê Serokê komar û hemû ew xortên bi emek ku li kêleka wî û di rêya komarê de canê xwe bi serbilindî ve bexşîne.

Hêja û pîroz be bîranîna Komara Kurdistanê

Serkevtin bo gelê Kurd û hemû gelên bindest yê Îranê

# Sefera Ehmedînejad bo Sûriyayê û ...

Selîm Zencîrî

**D**i rewş û zirûfeke hesas û dijwar de ku zext û

givaşên Rojava bo ser Îran û Sûriyayê xurt û ji her demekê Pêtir bûne, **Mehmûd Ehmedînejad**, Serok Komarê terorîst yê komara Îslamî ji aliyê **Beşar Esed**, Serok Komarê Sûriyayê bi Fermî hate vexwendin û roja pencşemî 19.01.2006'an



gihîste Demîşq(şam) a serbajara wî welatî. Givaşên cîhanî, pirsên siyasî, rewşê deverê û Rojhilata Navîn û hevdiîna bi rêxistinên terorîstî, mijarên bingehîn û girîng yên vê sefera du rojî bûn.

Her du rejîmên tepeserkar û dijî aştî û azadî yên Îran û Sûriyayê xwedî Peywendiyekî kevnar in û Peywendiyên wan jî li çaxê destpê kirina şerê Îran û Îraqê de bihêztir bû û Sûriya li cihê piştevanî kirin ji welatek Erebi aliyê Îranê girt. çunku wê demê serokatiya Partiya Bees a Sûriyayê di destê şîên Elawî de bû û rikeberî û dijatiyek kevnar di gel rejîma Bees a Îraqê de hebûn û nemaze Sûriya amade bû ku boriyên nefta Îraqê ku ji Sûriyayê ve derbas dibû' qût bike. Lê niha di têkilî û peywendiyên dervayî yên xwe de rewşek wekhev hene û di van salên dawiyê de jî her du welat ji aliyê Amerîka ve ketine bin zext û givaşê ve û her du rejîm jî bi gefek mezin bo ser aştî û hêminahiya Rojhilata Navîn, maytêkirin di kar û barên Îraqê û Piştevanî kirin ji terorîzm û girûpên terorîstî hatine nasandin.

Tê çavniherî kirin ku di pêşerojê nêzîk de dosiya Komara Îslamî bi sebeba xebat ji bo bidesveanîna çekên Etomî bigihîje konseya Ewlekariya Rêxistina Neteweyên Yekbûyî û herwiha rejîma Sûriyayê ji bi dest hebûn di terora Serokwezîrê berê yê Libnanê, **Refîq Herîrî**, bihêne sizadan û bikevine ber hisar û dorpêç kirinên navneteweyî.

Ehmedînejad serbarê got û bêj kirin tevî rayedarên mezin yên Sûriyayê û derbirîna piştevanî û hevalbendiya xwe li hember her terze gef, zext û êrişan ji aliyê Îsraîl û Rrojawa ve hevdiîtin bi Hizbulaha Libnanê û rêveberên girûpên terorîstî yên Felestinê (Hemas û Cehada Îslamî) pêk anî û piştgîriya xwe jî ji xebata gelê Felestinê bi dijî Îsraîl da eyan kirin. Hêjayî gotinê ye ku ev hevdiîtinane Piştî vê hatine encam dan ku roja berê Wezîrê parastina Îsraîlê, **Saûl Mufaz**, Îran û Sûriya bi dest hebûna rasterast di teqîna roja 19.01.2006'an li Tilavîvê de tawanbar kir û herweha Amerîka û Rojava ji ev hevdiîtinane rexne kirin û dan zanîn ku ev rejîmane, piştevaniya terorîst û girûpên felestinî yên neyarê Prosesa aştî û aramiyê dikin.

Bi giştî em dikarin seredana Ehmedînejad bo Sûriyayê di van çend xalên girîng yên jêrîn de kurt bikin:

- Nûkirina piştevaniya Sûriyayê ji Progremên Etomî yên Îranê li dema hinartin bo Konseya Ewlekarî ya Rêxistina Neteweyên Yekbûyî.
- Nûkirina hevalbendiya xwe bo rawestan li hember gef û zextên Rojava
- Nûkirina piştevaniya madî û menewiya xwe ji girûpên terorîstî yên dijî aştî û tenahiya deverê.
- Ji hemûyan girîngtir hêvîdar bûna Îranê ji piştevanî kirin û hevkarî û derb lédana rêxistinên terorîstî bi Îsraîlê li dema êriş kirin bo ser navendên Etomî yên Îranê.

## Bersiva PDK Îranê bi nameya xwendekarên Îranî yên parêzerên aştî û mafên mirovan

**Hevalên hêja!**

Me nameya we rewşenbîr û xwendekarên ku rû ji partî û rêxistinên siyasî yên dijî Komara Îslamî ya Îranê û yek ji wan Partiya Demokrat ya Kurdistanê Îranê kiribû, xwend. Hest bi berpirsiyarî kirin li hember welat û xelk û her wisan bîr û raya azadîxwazane û aştîxwazane ya we hêja û cihê rêzgirtinê ye. Em silavan ji we re dişînin û hewl û cehdên we ji bo pêkanîna yekîtiyê û hevgirtinê di navbera rêxistinên Îranî yên opozîsyona Komara Îslamî de bilind dinirxînin.

Hewece ye em bi bîr bînin ku PDK Îranê peywendiyêke dostane bi piraniya partî û rêxistinên opozîsyona Komara Îslamî re heye û hertim xebat kiriye ku wan rêxistinane ji hev nêzîk bike û heya vê qasê ku îmkân hebe eniyek ji wan hêzane pêk bihê ku bi awayekî berfireh gelek ji partî û rêxistinên azadîxwaz û demokrat di xwe de cih bide, heya niha jî li ser domadina vê xebatê berdewam e û tekezê dike. Ji ber ku li ser vê bawerê ye ku yek ji sedemên man û nehiloşîna rejîmê cudahî û ji hev dûr bûna hêzên opozîsyona rejîmê ye.

Bi raya PDK Îranê, pêkanîna yekîtiyê û hevgirtinê di navbera rêxistinên opozîsyona Îranî û xebata hevpar tenê ji bo armanca hiloşîna rejîma Komara Îslamî, nikare bibe sedema bidestveanîna armacên azadîxwazane û cihgir kirina demokrasîyê piştî hiloşîna rejîmê, karek ku di sala 1357'an ya Rojî(1979) de hate ceribandin û encama wê jî tenê cihgir bûna rejîmek dîktator û kevnarperwer li cihê rejîmeke ne demokratîk bû. Lewra her hevgirtinek divê bi li berçavgirtina du bingehên girîng bihê avakirin, yekem bi merema xebata hevbeş ji bo hiloşandina Komara Îslamî û piştre bi armanca anîne ser kara rejîmeke demokratîk ku bikare bersivderê xwest û daxwazên demokratîk yên gelên Îranê be.

Li gor vê çendê ku welatê me Îran, welatek pir neteweyî ye, bi hev re jiyana van neteweyane ku pêkhatiya nifûsa wê pêk tîne û bi mafên wekhev û misoger kirina mafên siyasî û neteweyî yên her yek ji wan û yekparçeyiya Îranê garantî dike. Partiya Demokrat ya Kurdistanê Îranê sistemekî demokratîk û federal jêhatî welatê me dizane û ji bo bidestveanîna wê jî xebatê dike û di vê derheqê de amade bûna xwe ji bo gotûbêjê teqîst wan partî û aliyên radigihîne ku baweriyêke rast û tam bi demokrasî û misoger bûna mafê wekhev yê hemû neteweyên Îranê hene û her wiha amade ye ku di rêya pêkanîna yekîtiyêke wiha û her wisan li hev kirin li ser van bingehane ku armancên wê li jor qala wan hate kirin misoger bike û encama wê jî hatine ser kara rejîmeke demokratîk, li hember qanûnên pesendkirî yên navneteweyî li dor maf û azadiyên mirovî de sozdar be, zêdetir ji berê cehd û hewla xwe bide.

Em hêviya serkevtinê ji bo we tev rewşenbîr, azadîbîr û azadîxwazan dixwazim.

**Partiya Demokrat ya Kurdistanê Îranê**

09.10.1384  
30.12.2005

# Rewşa mafê mirovan di Komara Îslamî ya Îranê de

Wergeran ji Îngilîzî: **Şoriş Palanî**

**E**va deqa biryarnameya Civata Giştî ya Rêxistina Neteweyên Yekbûyî di rûniştina şêstem û komîteya sêyem e ku li ser Îranê hatiye pejirandin û rê ji bo zêrevanî kirin li ser hikûmeta Îranê ji aliyê Komîsyona mafên mirovan ya Rêxistina Neteweyên Yekbûyî xweş dike.

Civata Giştî, ku di bin rênimayî ya pêrewa hundirîn ya Neteweyên Yekbûyî de, Carnameya Gerdûnî ya Mafên Mirovan, peymannameya navneteweyî ya mafên mirovan û pîvanên din yê navneteweyî ên mafên mirovan de ye. Tekezê li ser vê yekê dike ku hemû welatên endam naçar in erkê geşekirin û parastina mafên mirovan û azadiyên bingehîn bidomînin û ev erkên ku di peymannameyên navneteweyî de bi stûyê xwe girtine, bi encam bigehînin.

Em bi bîr tînin ku rejîma Komara Îslamî ya Îranê yek ji endamên peymannameya mafên siyasî û medenî, mafên aborî, civakî û çandî, peymannameya ji navbirina ferq û cudahiya nejadî û peymannameya mafên zarokan e. Bi mêze kirina biryarnameyên pêşîn di vê derheqê de, ku ya herî dawiyê biryarnameya 59/205 a 20'ê Desembara 2004'an û her weha biryarnameya Komîsyona Mafên Mirovan 17/2001 ya 20'ê Avrîla 2004'an e, bi baldan bi van ronkirinên hikûmeta Komara Îslamî ya Îranê li ser rêzgirtin ji mafê mirovan û bihêz kirina desthilata yasa di welat de:

1) Pêşwaziyê dike ji:

A) Rêdan û vekirina mekanîzma lêkolîneke bingehîn li ser mafên mirovan di Îranê de li Avrîla 2002'an de û dom kirina hevkarîyê Ji pêvajoya cehd û xebatên taybetî yê Komîsyona Mafê Mirovan li dema seredanên xwe ji bo Îranê de.

B) Seredana lêkolînevanê/a taybet yê a Komîsyona Mafê Mirovan ji bo Îranê li ser tepeser kirin û çewisandina jinan, sebeb û encamên wê ji 29'ê Janvîyê hetanî 6'ê Fevriyaya 2005'an.

S) Seredana lêkolînanê a taybetî yê a Komîsyona Mafê Mirovan bo Îranê li ser pirsgirêkên akincîbûn û avahî û xaniyan wekî parek ji mafên siruştî yê jiyane, ji 19'ê Jûiyê heta 30'ê Jûiyeya 2005'an.

D) Pêşniyarek di Desmbera 2002'an de ji aliyê serokê dezgeha dadwerî ya Komara Îslamî ku tê de hatibû gotin ku dadmend dikarin li cihê cezaya kevirbaran kirinê, ji

cezayên din mifahê werbigirin.

E) Daxuyaniya serokê dezgeha dadweriyê di Avrîla 2004'an de li ser qedexekirina îşkence û pejirandina yasaya taybet bi îşkence di Parlemantoyê de ku paşan ji aliyê Konseya Parêzvanan ve di meha Maya 2004'an de hate pejirandin.

F) Bicihanîna erkên Komara Îslamî ya Îranê wekî endameke biryarnameya mafên zarokan li ser pêşkêş kirina rapora xwe bi komîteyê di Janvîyeya 2005'an de.

G) Diyaloga Komara Îslamî ya Îranê û parek ji welatên li ser mafên mirovan, ku mixabin di van demên dawîn de beşek ji wan di demên destnîşankirî yê xwe de birêve neçûn.

H) Hevkarî tevî Rêxistinên Neteweyên Yekbûyî derheq xurt û



berfirehkirina progremên girêdayî bi mafên mirovan bi rêveberiya baş û hikûmeta yasa û qanûnê.

2) Nigeraniya xwe ya kûr dide xuya kirin ji:

A) Domandina sivikatî, gef lêkirin û sivikatî kirin bi berevankerên mafên mirovan, rêxistinên ne hikûmetî, cudabîrên siyasî û olî, reformxwazên siyasî, rojnamevan, Parlemantêr, xwendekar, Meleyên ayînî, akademîsyen û xwediyên malperên înternetî, herwiha ji rêya zevtkirina azadiya civîn û kombûnê, û derbirina bîr û ramanan bi terzeke ne berheq, bikaranîna girtin û bi çav kirina bi zorê ya takekesan û endamên malbata wan, girêdana bê sebeb a rojnemayan û filtêr kirina malperên înternetî, herwiha nebûna tu terze pîvanekî hewce bû hilbijartineke rewşa û azad, tevî bêpar kirina hijmareke berçav ji berbîjarên jin di helbijartinên Serok Komariya Juena 2005'an de bi terzekî zalimane.

B) Ne serkevtinên berdevam ji pabend nabûn bi merc û pîvanên navneteweyî derheq meşandina dadperweriyê, bi taybet nebûna

pirosesên hewce yê yasayê, xwe parastin ji misoger kirina dadgehî kirina berheq û giştî, rênedan bi pêdeçûn û bêparkirina girtiyar ji mafê nebûna parêzer, bikaranîna qanûnên ewlekarî yê nîştimanî ji bo bînpêkirina mafên mirovan, çavtirs kirin û sivikatî kirin bi parêzeran, bê rêz kirina standardên naskirî yê navneteweyî, di nava wan de yê ku ser bi kêmaniyên olî, neteweyî, yan jî cinsî û tixmî ne, fermî yan nafermî, bikaranîna hukmên dasepandî li girtîgehên û bê hurmetî kirin girtiyar, mifah wergirtina sistematîk û dasepandî ji girtîgehên takekesî û dirêjden, dabîn nekirina çavedêrên saxlemiyê ji bo girtiyar û rênedan bi tu kanaleke têkiliyê di navbera girtiyar û malbatên wan de.

S) Domandin û mifah wergirtin ji îşkencê, tevgeriyar û riftarên bêrehmane û dijî mirovî, weke: şelaq, birîna endamên cendekê mirovan.

D) Domandina çibcî kirine îdamê li hember raya giştî, îdama bi kom, ev îdamên ku berevajî qanûnên pejirandî yê navneteweyî ên pesend kirî birêve diçin û bi taybetî îdama ewên ku jiyê wan ji 18 saliyê kêmtir e ku ew jî berevajî wan qewl û sozane ye ku Komara Îslamî di benda 37'an ya biryarnameya mafên zarokan û herwiha berevajî benda 6'ê ya peymannameya cihanî ya mafên medenî û siyasî daye û serbarê wê ku Komara Îslamî bi dawî anîna îdama nûciwanan raghandiye.

E) Domandina tepeserkerin û ferq û cudahiyan dijî jin û keçan di yasa û kiryar de, serbarê hin pêşdeçûnên tesk yê yasayî û ret kirina konseya zêrevanî kirinê bo gav hilgirtin ji bo îşare pê kirin bi van cudahîdanên sistematîk ku ret kirina pêşniyaza endamên hilbijartî yê Parlemanê ji aliyê konseya navhatî ji bo çûn di nava konvansiyona ji nav birina her terza cudahîdanekê bi dijî jinan.

F) Domandina ferq û cudahîdanan û bînpêkirina mafê ewên ku ser bi kêmaniyên olî yan neteweyî ne, wekî Ereb, Kurd, Belûç, Cihû, Suniyan, xirabtir bûn û domandina ferq û cudahî û serkutkirina berçav ya Bihayiyar nemaze dest bi ser kirin û ragirtina bîzor a wan di girtîgehên de, zevt kirina azadiyên olî û mafê li darxistina rê û resp û kar û barên giştî, kavi kirina cihên pîroz yê olî, rawestandina cehd û xebatên civakî, zanistî, herêmî û asteng afirandin ji bo dest gihîştin li xwendina bilind, karkirin, bîme ... û bi taybetî tepeserkerina hovane ya vê dawiyê a Kurdan.

3) Daxwazê ji Komara Îslamî ya Îranê dike ku:

A) Rêzeke taybet ji mafê azadiya pêkanîna kom û civînan, raman û radebirinê û pişikdarî kirin di birêve

birina kar û barên giştî ku hevdem tevî wan qewl û sozên ku di peymannameya navneteweyî ya mafên medenî û siyasî de dane, misoger bike. Nemaze dawî bi sivikatî, tirs û êrîşkirin û dadgehî kirina cudabîrên siyasî û berevankarên mafên mirovan bîne û yên ku li ser bîr û ramanên siyasî bi naçarî hatine girtin, serbest bike.

B) Rêzeke zaf ji mafê şewirmend û destpêragihîştina bi parêzer di pirosesa dadperweriya cinahî de, rewşa jêhatî ji bo guhdan û pêdeçun di dadgeha xwedî jêhatî û bê alî de ku yasa têde hakim be, misoger bike. Dawî bi sivikatî kirin, tirsandin, gef û êşandina parêzeran û berevankar ên yasayê bîne û wekhevî li hember yasayê û pişgiriya ji wekheviya qanûnî bi bê baldan bi her terze ferq û cudahiyeke ji bo hemû aliyekê, bi taybet endamên kêmaniyên olî, neteweyî, zimanî û kêmaniyên din, naskirî yan berevajî we.

S) Îşkence û bikaranîna riftarên dijî mirovî û cezadana weke birîna endamên leş û şelaq lêdanê di yasayê de bi kiryar ji nav bibe û dawî bi bêguneh nasandina wan kesane bîne ku mafên mirovan bin pê dikin.

D) Dest ji îdama li hember raya giştî û îdamên din ku di bêrêzî û li gor pîvanên naskirî yên navneteweyî de tîn meşandin, hilgire û bi taybet îdama yên ku di dema encamdana tawanê de jiyê wan di bin 18 saliyê de bûye ku di vê dawiyê de ji aliyê Komîteya mafên zarokan li Janviyeya 2005'an li ser de nerazîbûn hatibû nîşan dan. Rêyê bo ji nav birina cezaya kevirbaranê û gav ji bo yasayî kirina vê bendê ku kevirbaranê bo hertim qedexe bike, hilgire.

E) Her terze ferq û cudahî, tund û tûjî dijî jin û keçan çî bi yasa û çî bi kiryar ji nav bibe û her wek Parlemantoya hilbijartî pêşniyaz kiribû ku biçe nava konvansiyona ji nav birina her terze cudahî dananekê bi dijî jinan.

F) Her terze ferq û cudahîdananeke olî, neteweyî, zimanî û her cure bînpêkirineke mafên mirovan bi dijî kêmaniyên, bi xasmanî Ereb, Kurd, Belûç, Mesîhî, Misilmanên Sunnî û Bihayîyan hilgire û van pirsane jî di zirûfeke jêhatî û bi pişkdariya wan kêmaniyên bînin ber bas û serbarê vê yekê jî rêz û rumeteke zaf ji mafê azadiya bîr û ramanê, ol û bîr û bawera hemû take kesan bihê girtin û rapora raporterê taybetî yê Komîsyona Mafê Mirovan di sala 1996'an de li ser pirsê olî birêve bibe ku pêşniyaza wan rêyane dike ku Komara Îslamî ya Îranê divêt pêş xwe bigre ji bo çawaniya azad bûna civaka Bihayîyan.

4) Haydana kakila mekanîzma Komîsyona Mafê Mirovan di nava wan de, rapora taybetî li ser îdamên serpê, bikom û neqanûnî, rapora taybet li ser îşkence û cezayên dinê yên dijî mirovî yên bêrehmane û hov, rapora xasmanî li ser serxwebûna dadmend û parêzeran, rapora taybetî li ser azadiya olî û bîr û bawerê, rapora taybetî li ser pêşvebirin û parastina maf û azadiyên raman û derbirîna bîr û ra, nûnerê taybetî yê Sekreterê Giştî li ser rewşa parêzvanên mafên mirovan û koma kar li ser winda kirina bi zorî û nexwestî, dide ku ji serdan û çelengiyên xwe ji bo baştir kirina rewşa mafên mirovan di Komara Îslamî ya Îranê de bidin, herwisan bi micidî daxwaz ji Komara Îslamî ya Îranê dike ku hevkariyê tevî wan mekanîzmên taybetî bike û nîşan bide ku çawa pêşniyazên wan bi taybetî li seredanên wan komane di 12 mehên rabihurî li berçav girtine.

5) Biryarê dide ku di lêkolîn li ser rewşa mafê mirovan di Komara Îslamî ya Îranê de li rûniştina 6'an ya xwe di bin navê karnameya pirsê mafê mirovan li jê ronahiya rapor û hevkariyên Komîsyona Mafê Mirovan berdewam be.

## Xwe kuştina 150 jinên Kurd li Azerbaycana Rojava


Li gorî agehiyên daxuyaniya nû ya Rêxistina mafê mirovan li Kudistanê, 150 kes ji jinên Kurd li parêzgeha Azerbaycana Rojava dest bi xwe kuştin û xwe şewitandinê kirine. Ev serhejmariya balkêş tenê di van çend mehên borî de hatiye encamdan. Daxuyaniya RMMK'ê dide xuya kirin ku jinên han ji bo xuyakirina nerazîbûnê li hember tund û tûjiyên malbatî û civakî dest bi xwe kuştin û xwe şewitandinê kirine.

Komîteya jinan ya RMMK'ê nav û paşnav, temen û berrava ji dayik bûnê, rewşa kar û xebitîn û malbatê, asta xwendin, rewşa zewac û nezewicînê û berrava xwe kuştina hemû wan jinên Kurd dayiye zanîn. Li gorî zanyariyên daxuyaniya navhatî navinca temenê wan jinên ku kiryara xwe kuştinê encam dane, di navbera 14-30 salî de bûne û piranî kêm xwende û li warê karî de tenê karên di nav malê de dikin û qasê %50 ji wan zewcine.

Mixabîn em rojane berdewam nûçeyên xwe kuştina jinên Kurd di parêzgehên Îlam, Kirmaşan, Kurdistan û Azerbaycana Rojava (bajarên Kurd akincî yên Îranê) dibihîsin. Em weke Desteya Nivîskar ya Agirî kul û kesera xwe bona bihîstin û wergirtina nûçeyên wiha bi kul û elem yên xwe kuştin û xwe şewitandinê jinên Kurd didin xuya kirin. Em bawer in zêde bûna zaf ya wan bûyerane bi awayekê vêzarî û nerazîbûna jinan ji sîstema mêr serdestiya heyî di civaka Kudistanê de dide nîşandan û rewşa nebaş, bêmafî û bînpê kirina mafên wan yên herî sereke, tûnd û tûjiyên malbatî, fizîkî, ruhî-rewanî û ... sedemên vê bûyera bi jan in.

## Wexera dawî ya Pêşmergeyekî kevnar yê PDK Îranê

Mixabin sibêdeya roja îne,  
30'ê Befranbara 1384'ê Rojî,  
yek ji Pêşmergeyên kevnar yê  
Partiya Demokrat ya



Kurdistanê Îranê, bi navê **Mihemed Sipasî** xelkê bajarê Nudşeya Hewraman di bûyereke bi jan û dilêş ya tirumbêlê de canê xwe ji dest da.

Kekê Mihemed Sipasî di sala 1358'an de bi hest kirin bi çewisandina gelê xwe hate nav refên Pêşmerge yên PDK Îranê û di Hêza Şaho ya vê demê de hat cihdan (sazmandan). Sala 1363'ê Rojî di nexweşxaneyê **Şoris**'ê de erkê Pêşmergeyatiyê birêve dibir û di sala 1365'an de vegeriya nava Hêza Şaho û heta sala 1367'an li wir têkoşin û xebat dikir û piştê ji sala 1367'an re di naxweşxaneyê 25'ê **Gelawêj**'ê dirêjî bi xebata xwe da.

Di navbera salên 1369 hetanî 1372'an li binkeya Peywendiyên Partiya Demokrat li bajarê Raniyê û Koyê ya Kurdistanê Îraqê têkoşina xwe domand.

Di salên 1372'an heta dema şehîd bûnê di Komîsyona Malî û Komîteya Xedematê de dirêjî bi erk û wezîfên Pêşmergeyatiyê xwe da.

Kekê Mihemed Sipasî li heyamê pitir ji 26 salên Pêşmergeyatiyê de ji ber fidakarî, dilsojî û baştir birêvebirina kar û baran du caran ji aliyê organên partiyê ve hate teşwîq kirin.

Em ji aliyê Desteya Nivîskarên Rojnameya Agirî ve behî û serexweşiya xwe pêşkêşî malbat û kes û karên Kekê Mihemed Sipasî û xelkê bajarê Nudşê û bi giştî devera Hewramanê dikin û xwe jî li xem, keser û kovanên wan de bi şîrkî û pişikdar dizanîn.

**Ruha wî her şad û hêviyên wî misoger bin.**



# ŞAREZAYÎ

ADAR JIYAN

adarjiyan@mynet.com

Ş arezayî, her çendî ku îro wekî hemdemî, aştî, aramî û hêmindariyê tê bilêvkirin jî ew, ji reseniya xwe bi dûr ketiye û tenê wekî têtîneke

rojane di suxreya şer û lêkdanên tundrew de tê bikaranîn û xebitandin.

Kok û wateya peyvê ya têtîni xwe dispêre dem û domanên kevna: Şarezabûn, di her dem û domanên borî de wekî liv û tevgerê pêşketî ya şarde û şareza hatiye zanîn û qebûlkirin. Belê îro rasterê girêdayî rewşa aborî (şêwe û şewaza hilberînê û alav û amrazên wê) dirb û dirûv digire. Belê ev rêbaz ne pêkan e ku her car wekî pîvangeke neguherbar û misoger a erênî û sûdewar were dîtin û pejirandin. Lewre car heye rewşa aborî an jî dewlemendîbûna mirov (an jî civakê) dibe egera şer û şerûdiyên tundrew û hinceta pevçûnên lêkneker û dagîrker. Û li ser navê şarezahiyê, bi dagîrkirin û wêrankirina cih û warên ku şaristaniyên qedîm û kevna dest pê kirine, diencime.

Îro wisa bûye ku rewşa jiyana her mirovî/ê li gorî şewaza hilberîna wî/wê ya komelî dişêwe û dirûv digire. Ango her kes bi qasî hêz û teqeta xwe ya aborî dikare bijî, tevbigere û pêşve biçê. Û bi gelemperî jî ev yek tim û dayîm wekî şarezabûneke yekgirtî tê zanîn û binavkirin. Çendî ku ev nêrîn bi giranî wekî rastiyeke giştî were dîtin û pejirandin jî, kêmaniyeke veşartî di xwe de dihevine. Lewre her pêçveçûn û nûbûn her gav nayê wateya şarezabûn û şarmendiya civakê. Şarezabûn bi serê xwe têtîneke dîrokî, civakî û komelî ya herî girîng û manîdar e. Ji bo wê, divê ku ev têtîni bi awayakî berfireh û zanayane were dahûrandin, nixxandin û ravekirin.

Mixabin gelek têtîni li gorî bîrdoz û ramyariya civakên çîndar û her wiha jî hêla hêz û kesên serwer û desthilatdar ve têtîni navandin, ravekirin û belavkirin. Ji bo wê pirê caran peyv, gotin û têtîni ji wateya xwe ya rastîn bi dûr dikevin û li wateyê bêwate û beropaş dadigerin. Bi ya min şarezabûn jî yek ji van têtînan e ku ji wateya xwe pir bi dûr ketiye. Îro em dinihêrin ku dûtîgel(dewlet) û xuhermendên(hikûmetên) desthilatdar ên ku çerxa pergala dinê

li gorî berejewendiyên wan dizivire, ev têtîni û bêjeyên zanyarî lewitandine û wateya wan bervajî kirine. Ew, her tîştî li gorî dilê



xwe rave û şirove dikin û li gorî daxwaza xwe bi gel û civakên dinê didin pejirandin. Dîsa mixabin kesên ku navê rewşenbîrî, ronakbîrî û zanyariyê bi ser xwe xistine jî bi dêla wan diçin avê û van têtîni watedar xetiş dikin û diçilvirînin.

Carekê şarezabûn, livdariya ku mirov ji bizav û tevgerên hoveber ên lewirî reha dike û digihîne radeya mirovbûnê. Şarezabûn, azadkirin, rehakirin û şardekirin tevê mirovahiyê ya ji şer û pevçûnên paşverû, ji lêdan û lêkdanên hoveber, ji dagîrkirin û wêrankirînen kevnepêst e. Nexwe îro mirovahî di nav van neyîniyên hemdem û rojane de, bi hovîtî û kirêtîyên herî erjeng û xeternak re rû bir û maye. Ma mirov dikare van neyîniyên îroyîn wekî şaristaniya dinê an jî şarezabûna mirovahiyê bi nav bike? Na. Çimkî ev yek ji şarezabûn û şaristaniyê bêtir stembarî û zilûmat e.

Bêguman dahêndandina alav û amrazên teknolojiyê, pêşketina perwerdehî û hîndekariya mirov, guncandî û hêsandina azîne û rêbazên zanîne yên ji bo jiyana rojane, pêkanîna rêkeftin û ragihandina navbera mirovan û hwd... nîşaneyên şaristaniyê ne. Belê mixabin ev yek tu car bi mebest û hinceta ku hemû mirovên dinê(mirovahî) jê sût û fêdeyê wergirin pêk nehatiye. Heçku armanca û qesta sereke ne ji bo aramiya dinê û lihevhatina mirovahiyê ye. Hincet û niyet ji aştî û azadiyê bêtir dagîrkirin, kuştin, talankirin û wêrankirina dinê û felîşandina xwezayê ye. Heke car caran bi nivdevî behsa şarezabûna mirov an jî şaristaniya dinê ya gerdûnî were kirin jî, tenê ev yek ji bo asûdeya çend kes û hêzên ku xwe wekî qeyser û serwerên dinê dihesibînin, tê kirin. Bi rastî bi vî awayî ne şaristaniya dinê bi dest dikeve û ne jî şarezabûna mirov pêk tê.

Şarezabûna rastîn aştî, azadî, aramî û şardekirina mirov û ahengdariya wî/wê ya bi xwezayê re ye. Belê mixabin em dinihêrin ku li ser rûyê dinê hê jî tu heyîn û heyberên ku bikaribin bi qasî mirov xisaran bibê, nin in. Ji bo wê mirov dikare bibêje hêj şarezabûneke giştî dûtî mirovahiyê û mirovahî bi xwe jî dûtî şaristaniyeke gerdûnî ye.

Kaniya Helbestan

## GAZIN

Latîf Epozdemir

Tarîfî çû şev bû sibe  
Ji pişderê were der,  
Roj li esman bendewar e  
Êdî hiv xwe nade ser.

Çavên reş gerdena bi xal,  
Di biriqin bin rojê  
Bisk honayî bûne du mal  
Keziyê dirêj ta bejnê.

Xortê ciwan xwe parastin  
Ji xetera evînê  
Her yek ji wan xwîn alastin  
Ji kaniya birînê.

Karwanê derd û kula me  
Bar dikşînin pişt û dil  
Xizmet ji bo wê ola me  
Nayê xwarê nîr ji mil.

Hozan ji dest borand jî nê  
Dil û cerg lê bûne nar  
Kal bû li benda evînê  
Ew ji ya xwe nayê xwar.

## KARWAN

Hat karwanê jiyane  
Li meydanê bû cîwar  
Kuta bû hepsa zîndanê  
Girtî bûne bextiyar.

Kar di zikê xezalan  
Di pê n rojên azadê  
Rê li pêşiya karwanan  
Ji do çêtir amade.

Zivistan tim reşî bû  
Me nedî rojek bi şeng  
Xewn û xeyal betal bûn  
Bi şev bi roj dil ma teng.

Derkeve roja zela  
Bide roniyek zêrîn  
Rabe tu keça delal  
Ku em bêjin aferîn.

Ey serdarê azaran  
Bes li me bike êza  
Neyne kêfa neyaran  
Cuda neke bê riza

# Pîremêr

## Daphe du Maurier

[Cara yekê hatiye belavkirin: 1973, ji aliyê Lewis Jones ve hatiye asankirin. Ta sala 1993ê 17 caran hatiye çapkirin]

### Wergerandin ji Îngilîzî: Cankurd

Çi demê ew cara yekê hatibû vir? Nayê bîra min. Kesek nizane. Pîremêr berê li vir bû, gava ez gihame vir. Û ev jî berî çend salan bû.

Ev ciyekî bedew e. Xasma zire (*behir*) û gol. Dibe ku ew hatiye vir, da bireve - *wek min* - reva ji ber xelkê û bajaran.

Hetanî di destpêkê de jî, ez hizirîm "**Pîremêr ji xelkê heznake.**" Ew li vir dijiya, li ber golê, û ewa li gel wî bû. Ciyekî wan ê nedîtî hebû. Ba û baran dihatin, lê ne xema wan bû.

Kesekî zevîkar gote min: "**Ji pîremêr ve nêzik mebe. Eger ew te nenase, ew ji te hez nake.**"

Wilo ez bi hajêkirin bervê çûm, û ez bi pîremêr re nepeyivim. Ji xwe min bi zimanê wî jî nedizanî.

Tê bîra min cara yekemîn min ew dîtiye. Ew li keviya golê bû. Ez li aliyê dî bûm, li ber zireyê. Wî di ser avê re dinêrî. Ez wilo pêhiş bûm, ku pêwîst bû tew ez ne li wir bama. Min xwe di paş hormanekê de veşart. Paş min bi dûrbîna xwe li wî temaşê kir.

Ew kesekî qanat ê gir bû û hêzdar bû. Çi bi hêz û zor bû! Seriyekî xweşik: Wî wek şahekî rakiribû. Erê - wek şahekî. Qey xûna şahekî rastîn di govdeyê wî de digeriya? Xwîna malbatekê şahanî ya kevnar? Hovbaz, xwînek germ. Ma wê (*xanê*) pir caran ew sergerm dikir? Ma bo vê yekê ew buve "*xeter*" bû?

Min tenê ew bi dûrbîne berçav dikir. Ma wî dizanî, ku ez li wir im?

Gava wî bi paş ve nêriya, min dîsa xwe xiste paş hormanê. Ma wî ez dîtîm?

Diyar e ez berçav nekirim. Ew nermnêrm bi dûr ket, vegeriya çû mala xwe û ba jina xwe.

Min ewa di roja yekemîn de nedîtibû, lê min ewana paşê bi hev re dîtîm. Bi hev re hatibûn zireyê û hinek masî girtibûn. Ewan vedigeriyan golê gava min ewana dîtîm. Ew di pêsiyê de bû, bêguman. Ewa jî (*xanima wî*) hêdî hêdî û nazdar. Ne wek wî asê bû.

Ez li ser zinaran rûniştîm û min li wan temaşê kir. "*Dibe ku pîremêr dixwaze raweste û ji wê bixwaze, ku ew here mal.*" Ez wilo hizirîm. " Dibe jî ew dakeve û ber bi min bê. Çi niha? Rast ez nizanîm. Ezê rabim ser xwe û berken bibim. Ezê biramînim, û ezê bibêjim: "**Beyanî baş**" û biçim. Ez bawer nakim ewê tişteki bike. Ewê bi

çavên nedît û zirav li min temaşê bike, lê ewê min ranewestîne."

Paş wê yekê, ez her li xarê, li ser qûmê an li ser zinaran bûm.

Zivistan û havînê, ewan jîna xwe ya nenas û asan dijiyan. Carina masî di golê de digirin û carina di zireyê de. Carina ewan diçûn bajarê biçûk ê li ber zireyê û li gemîkan temaşê dikirin.

Tiştêk diyar bû- wî ji wê hez dikir û wê jî ji wî hez dikir.

Wî carina ewa li mal dihêst û dûr diçû bo masiyan bigire. Gava her car êvar dibû, ewa dadiket zireyê. Wê dikarî wî ji dûr ve di rê de bibîne. Ew rasterast ber bi wê dihat û hevdu maç dikirin. Bo vê yekê min ji wî hez kir.

Tu dipirsî, "**malbata wan hebû?**" Ha. Erê. Divê ez ji te re hewalim li ser tişteki nebaş, ku qewimî ye û kesek ji min pê ve pê nizane. Dibe ku bûyereke ji ber xwe bû. Sedased ez nizanîm.

Erê, malbata wî hebû - sê dot û kurekî. Ewan tev li ciyê berê, li ber golê dijiyan. Min bêtir ji dota ciwantir hez dikir. Ew tenê tişteki biçûk bû. Min navek dayê - **Tiny**. Di sibeyek xweş de, ew dadiket golê di pêsiya yên dî de. Ew xwîn xweş û şirîn bû.

Min navek da kur jî - **Boy**. Ew ji gişan mestir bû, lê bi rast bêhiş bû. Tiştêk rast û dirist nedikir û ne wek bavê xwe yê jîr bû. Carina keçik bi tenê dilîstin, lê **Boy** na. Ew li mal dima, li ba dayîka xwe, ew rast wek kurikekî bû.

Min ji xwe re kiribû kar, ku ez hêzingan li ber golê bicivînim, û min li wan temaşê dikir. Carina ewan giş bi hev re diçûn nav zireyê bo masivaniyê. Pîremêr bêguman her berpîrs bû û Tiny harîkariya wî dikir. Lê belê Boy- hêdîka, **Boyê** bêhiş - her li dawiyê bû.

Dem derbas bû û biçûk mezin bûn, bi zûkî Boy ji pîremêr girtir bû. Hema ox, ciyawaz! Ne hêza bavê wî li ser hebû û ne jî jîrbûna wî.

Wek encam, ez hizirîm ku pîremêr ji ber ve şerm dikir. Boy wilo baş li mal jî kar nedikir. Ez vê baş dizanîm. Ew wilo bêhiş bû ku nedikarî asantir ji keçikan masiyan bigire. Heger dayîka wî li wir ba, ew tenê li tenişta wî dima.

Pîremêr bi wê ne dilşad bû. Min dikarî ev bidîta. Ew xeyidî bû ji ber ku Boy wilo girs û bêhiş bû. Pir xeyidî bû.

Dawî jî ew bûyer pêkhat.

Rojekê di dawiya payîzê de bû. Dema min hewna dîtine, min hinek xwarin li bajêrkê dikirî. Pîremêr, jina wî, her sê keç û Boy. Ewan tev ber **Pontê** hildikişîn - avpijka ku av ji wê tê xwarê û dadikeve diçe zireyê. Li wir li Pontê tenê çend mal hene û zevîdariyek û dêrek jî di nêz wir de ye.

Famîle "*malbat*" taze û pak dixuya. Min got, ku dibe ewan diçin serîlêdana dostina. Min carek dî ewan nedîtîm, wa paşnîvroja xweşika Şemiyê.

Roja dî, bayekî tund di ser golê re bi ser me de hat: Bahozek bi xeyd ji rojhilat ve. Ez di mal de mam û ez bi carekê derneketim. Ez heyirîm, ku çawa pîremêr bi malbata xwe ve hîn li Pontê bi dostên xwe re maye.

Şêşem bû, dema bahoz teva bûye û ez dîsa ber bi zireyê daketim. Zêt û parçeyên textên şikestî li her derekê, li ser qûmê belav bûbûn. Hergav wilo ye paş ku bahoz ji aliyê rojhilat ve hiltê. Min di ber golê re ber bi ciyê pîremêr ve nêriya. Ew li wir bû, ewa "*jina wî*" jî bi wî re bû, li keviya golê. Lê min nedikarî ciwanan bibînim.

Ez hizirîm, ku tişteki ne dirist heye, û min li mayiyê malbatê çavkir "*intizar kir*". Ew hiç nehat. Ez di dora golê re çûm aliyê dî û min dîsa ji wir da bi dûrbîna xwe nêriya. Ewan tew ne li wir bûn. Pîremêr di wan derana re digeriya û jina wî xwe da bû ber royê. Ewên dî li ku ne? Ma di bahozê de bûyereke bi seriyê wan hat? Na..Eger pevketinekê çêbû ba, wê kesekî bidîta. Ewan hîn li Pontê, li gel dostan in. Ewan çûbûn tatîlê, an jî dûr çûbûn li kar digerin.

Ez xemgîn bûm.

Min carek dî keçik nedîtîm. Hiç ez hizirîm, pîremêr ewan giş derkirine. Reş dixuya, lê dibe jî bo wan wilo çêtir bû.

Bêhişiya Boy têra vegera wî dikir. Paş sê hefteyan, ez di ber kaniyê re, di nav daran re diborîm, di navbera min û ciyê pîremêr lê rêyek dirêj hebû, û yê pêşîn, ku min dîtiye, Boy bû.

Wî tiştêk ne dikir. Ew tenê li wir, li ber avê rawestiya bû û wilo bêhiş dinêriyê. Wî di ser golê re dinêriyê, ber bi pîremêr, û ew tirsîya bû. Min xwast ku bibêjim: "**Çi heye?**" lê ez tenê li wir rawestiyam, wek Boy.

Paşê pîremêr seriyê xwe livand û boy dît. Ew wek bayê bi keviya golê de firiya. Ber bi Boy lezkir û ezê hiç ji bîr nekim. Ew çavsoorbûyî dixuya. Ew seriyê heja niha xeyidî bû, buve bûbû, û ew diqêriya.

Boy li ciyêki geriya, ku xwe veşêre, tenê geyayê bilind li keviya golê hebû. Ew ewqas bêhiş bû ku çû nav wir. Ji wî ye ku di wir de tişt pê nayê. Boy gir bû wek pîremêr, lê ew tirsonek bû, nedikanî şer bike. Min dizanî. Wî tew nedikanî.

Ez tirsîya bûm. Min biryar da, ku pêwîste ez pîremêr rawestînim, lê

belê ez ne mêrekî wêrek im. Ma dil di sîngê min de hebû? Lê ew ji nişka ve rawestiya. Min bihîst ku ew tiştêkî bi xeyd dibêje. Tiştên nebaş. Paşê ew jê qêriya û bi paş ve zivirî.

Ez rawestiyam, lê tiştêk nebû. Gava bû tarî ez çûm mal.

Roja dî, ez dîsa daketim çûm ber golê. Min bi xwe re çoyekî mezin bir ku wêrekîyê bide min.

Û Boy li wir bû, dîsa di teniştaya dayika xwe de. Ez xweşiyar bûm.

Roj derbas bûn û Boy nêzîk dayika xwe rawestiya bû. Pîremêr ne wek berê û ne dilşad dixuya, êdî bi tenê xwe li ber zireyê dinişt û di ser avê re dûr dinêrî. Min ji wê yekê hez nekir. Niha hemû tişt bo wan hatiye guhartin. Ew tenha bû û jina wî li gel Boy bi serê xwe radiwestiyar. Êdî tirsê ez girtim. Tiştêkî nedirist bûye. Tiştêkî wê bibe.

Bi şev baranek giran lêkir û roja dî rojek xulfrêngî û sar bû. Çile "Dêsember" di ser golê re wek ewirekî hatibû rêxistin. Di paş nivroya zirav de, ro wek pereyekî zer di avê de dixuya.

Min dît ku pîremêr û jina wî li nêzîka ciyê xwe bûn, wan bi aliyê min de nêriyan, lê tiştêkî negotin. Boy ne li wir bû û ew ne li ber avê jî bû. Ez di ber keviya rastê yê golê re çûm. Dûrbîna min jî bi min re bû, lê min nekanî Boy bibînim.

Paşê min ew dît û di ber kenarê re ez ber bi wî ve beziyam. Ew di nav geyayê bilind de dirêj bûbû.

Ew mirî bû.

Birînek kûr li govdeyê wî hebû. Xwîna zuwa li ser piştaya wî hebû. Ew tevahiya şevê li wir dirêjkirî mabû û laşê wî jî baranê şil bûbû.

Dibe, tu bihizirî, ku ez bêhişim, lê min dest bi girî kir. Min bi aliyê pîremêr ve qêrî kir, "**Te ew kuşt, te ew kuşt!**" Wî bersiv neda. Xwe tew nelivand. Ew li wir tev jina rawestiya bû û li min temaşê dikir.

Ez bi şûn ve çûm û min tevşûyêk anî, û min gorek ji Boy re kola, di nav geyayê hegin de li ber avê. Gava min teva kir, min di nav golê re li pîremêr nêriya.

....û min çi dît?

Wî seriyê xwe yê mezin ber bi wê kir, û gihand devê wê. Wê jî seriyê xwe ber bi wî kir, û ramûsand. Ewan dîsa bi hev re bûn. Azad bûn. Bi hev re derketin nivê golê, û ji nişka ve pîremêr ji nav avê bi ezmên de hilbû, û ewa jî bi pey wî ket. Min temaşê kir çawa wan herdu firindên sipî û mezin ji nav zireyê difirin. Ewan rast ber bi royê ve firiyan, û min tiştêkî ji wê yekê xweşiktir di teviya jîna xwe de nedîtibû.

Herdu qaz li wir difirin, bi tenê, di zivistanê de.

## Duyê Rêbendan

**Bi boneya 60'mîn salvegera avabûna Komara Kurdistanê hatiye hûnandin.**

**Osman RAJANÎ**

Evro dîsan cejnane ye Kurdo, cejna we pîroz be Kurdistanê tu dilşad be, bi te re me eva soz be Cejna me Kurdan hat dîsan, pêkve tîfî liyan lê din Ma bindestî bese êdî, heta kengê eva doz be

Rêbendan meha sirê ya, bo me Kurdan gelek germe Keç û xurt dîlanan bigrin, befir bibare li ser me Bizanin duyê Rêbendan e, bîranîna Pêşewa ye Nebin xidok, nebin xembar, lê giryan bo me zor şerme

Dîsan hat duyê Rêbendanê, roja piçyana tim bendan Neman dergehên hişk û req, borîn rojên xem û derdan Qazî Mihemed li Çar Çira, di gel komek bab û bira Got ku em Kurd in, serbest in, neman hepsên tarê û zindan

Çaxê ku duyê Rêbendan tê, şadî dikeve her çar kinar Bilbil dixwîne ser çiyar, zivistan me bûye bihar Duyê Rêbendanê ku tê, şad dibe dilê hemûyan Bo Kurdistan rengîne, kur û keç dibin evîndar

## Evîn

serbest\_urmiye@hotmail.com

Ji.....

Min nagerî

Dest...

Ji dil bernadî

Li xewnê şevan

Sihara sibêdeyan

Li xerîbistanê jî

Herimandiye

Te.....

Li min jiyar

Evîna bê xwedî

Lorîka dergûşa reş

Wejiya firiçka xwîne

Tu.....

Ji çi malbatêyî

Diya te kê ye?!

Bavê te kê?!

Qey.....

Tu li goristanê jî dê tevî min bî

Dest.....

Berde ji min

Dil.....

Vêzar e ji te


Evîna derewîn

Tu.....

Ne ax û jiyarî

Ku.....

Bimrim li ser te ez



## Yekîtiya Ciwanên Demokrat a Kurdistanê Îranê bû endamê Yekîtiya Navneteweyî a Ciwanên Sosyalîst

Yekîtiya Ciwanên Demokrat ya Kurdistanê Îranê ji aliyê 27'mîn kongireya Ciwanên Sosyalîst ku di rojên 12-15'ê Janviya sala 2006'an de li welatê Danmarkayê de

hate lidarxistin,, wek endamê zêrevan yê vê rêxistina mezin hate wergirtin.

Hilbijartina YCDK Îranê di vê kongireyê de gavek bihagiran bo nasandina doza Kurd bi ciwanên cîhanê û her wisa ji bo



baldana wan bo piştevanî kirin ji xebata netewî -demokratîk ya gelê Kurd di Kurdistanê Îranê de ye. Bi berçavgirtina giraniya Yekîtiya Navnetewî ya Ciwanên Sosyalîst di asta cîhanê de, wergirtina YCDK Îranê di vê saziya navnetewî de derfeteke girîng e bo Ciwanên Kurd ku berheq bûna xebata gelê Kurd bi tevahiya gelên cîhanê bidin nasandin û wan ji siyaset û kiryarên dijî mirovane yên rejîma Komara Îslamî ya Îranê derheq gelê Kurd haydar bikin.

## Serhildana nexweşiya Anfulenzaya Balindan li Kurdistanê Îranê



Li gor nûçeyan, nesaxiya Anfulenzaya (şewba) Balindan(çûkan) ku heya niha li Turkiyê canê çend kesan girtiye, bajar û gundên parêzgeha Azerbaycana Rojava li Kurdistanê Îranê, bi xasmanî bajarên Mehabad û Nexedê bi xwe ve

girtiye. Hêjayî gotinê ye ku ev nexweşiya di roja îne 23.10.1384(13.01.2006)'an de hatiye dîtin. Heya niha tenê zarokekê li bajarê Nexedê seba vê yekê jiyana xwe ji dest daye.

### Komara Îslamî li hember destpêbûna nexweşiyê xwe bêdeng dike

Ew rewşa di demê de ye ku rejîmê bangewaza nebûna vê nesaxiyê û tûş nebûna tu kesê pêve dike. Lê heya niha li gundên Mehabadê de wek Xur Xurê, Qeredax û ... bûye sebaba kuştina hezaran Balindên wek: Eleşîş, Qaz, Mirîşk û wd ... Serbarê vê çendê jî rejîmê tu gaveke hewce ji bo pêşgirtin ji vê nexweşiyê ne avêtî ye. Bo minak ev mirîşkên ku dimirin li cihê vê çendê ku çal bikin yan bişewitînin, li derdoran tîn avêtin.

## Lidarxistina civînekê li ser dirûşma stîratêjîk ya PDK Îranê li bajarê Helsinkî a Fînlandayê



Li gorî rapora Komîteya Helsinkî ya PDK Îranê li welatê Fînlanda, roja 2'yê Rêbendanê, hevberî

22.01.2006'an, bi amadebûna birêz Ebdulriza Kerîmî, nûnerê PDK Îranê bo tîkiliyên Opozisyona Îranê, Komîteya PDK Îranê li Helsinkî, civînek ji bo bas û gotûbêj li ser dirûşma stîratêjîk ya PDK Îranê, **bidestveanîna mafên neteweyî yên gelê Kurd, di çarçoveya Îranek demokratîk û Federal de pêk anî.**

Civîn bi sirûda neteweyî ya **Ey Reqîb** dest pê kir. Piştê rêzdar Ebdulriza Kerîmî, tevî amajekirin bi pêkhatiya pir neteweyî, entîkî û olî ya Îranê, merca çîgîrkirina demokrasîyê û parvekirina desthilatê di navbera gelên pêkhêner yên Îranê, Federalîzm wekî garantiyek ji bo hevgirtina Îranê û ji hev belav nebûnê zanî. Kekê Ebdulriza her wisan li dor ceribîna welatên pêşverû yên cîhanê, li ser bîngeha demokrasî, parvekirina desthilatê û pêkanîna bîngehên civaka demokratîk, got: " sirûsta pir neteweyî bûna civaka Îranê, rewş û pêvajoya herî jêhatî ye ji bo pêkanîna navendên demokratîk, ji bo kêmkirina desthilata navendê û hevgirtina dilxwaz".

Beşa duyem ya civînê ji bo bas û gengeşe li ser mijarê hatibû terxan kirin ku beşdarên civînê bi awayekî çeleng di basan de pişikdarî kirin.

Di vê civînê de hejmarek ji endam, alîgir û çalakên warê medenî, rewşenbîr û her wiha hejmarek ji Îranî yên Azerî û Fars ziman jî beşdar bûn.